



## Ավետիք Իսահակյան

### Մի մրահոն աղջիկ տեսա

Մի մրահոն աղջիկ տեսա  
Ռիալտոյի կամուրջին,  
Հորդ մազերը – գետ գիշերվա,  
Եվ հակինթներ՝ ականջին:

Աչքերը սև - արևներ սև,  
Արևների պես անշեջ,  
Գալարում էր մեջքը թեթև  
Ծաղկանկար շալի մեջ:

Աչքս դիպավ աչքի բոցին,  
Ու գլուխըս կախեցի.  
Ժպտաց ժպտով առեղծվածի,  
Հավերժական կանացի:

Միամիտ չեմ՝ հավատամ քեզ.  
Տառապանքս փորձ ունի. –  
Մի մրահոն կույս էր քեզ պես,  
Կտորեց սիրոս պատանի ...

1925

Վենետիկ